



www.BibleForChildren.org

Matyu 26



Xaidap 6 muga
mana Taunga
Dalingama, baing
Yesu ila sok Betani,
Lasaras yabania, lipua Yesu
iti mesa muli mana matianoa.
Baing Maria xap nanggola
baxagi mana guxenga
saminam ditongtongia
mana xai tela duxu ba nad.




Daxaningxaning
axamang tela
mana te, binabu
giminaginoa sabanga
sibuna. Baing matu mari
mana Yesu kindi, sabaxaya,
saking sisiadi toxolonia.
Baing guxenga ba
samingang xai sibuna
baxagi mana numua.



Baing Yudas Iskariot, ina tela mana Lipu 12, ila rangua lipu hananiangamdi yanamidingdi bu hamaringia daxanga tela mana ta Yesu rimadingia. Baing dilungu diyaha sibuna, saing dahau haruangua ba disina sianga na. Binabu sai daxanga ba ta Yesu rimadingia.



Baing ina naga, lipuadi dinaxu
mana ba dilibu Yesu haruangoa
saing daxauxau Taunga Dalingam
angianoa la ba. Daxang mua, baing
Yesu xap salangua, harua xai
sibuna na Urana, saing utu saha.
Sina na lipuxindi dinaxu mana,
saing harua ba, “Axap axang.
Alali mututungagua.”



Baing xap xubua, saing harua
xai sibuna na Urana. Sina nadi
saing harua ba, “Ang taining
tainina anung. Alali sibigua mana
hau Urana haruanganoa
haringina, matuxuya mari bu
yunga lipu xumana kuboluding
diandi.”



“Saimon, Saimon, bagu Satan xusunga Urana ba tubang bila lipudi diting wit mahaing bu ditibaxaya yoxodi mala. Ne ngasabu maung masup ba hatumingam haringina bagula xung mari masup te. Kimu, bungina ugoxoya ma rangua nga, bing uharingia riamdi bu dili haringina muli.”



Ne haxuya ba, “Toxoratamona, ngaxauxau hatumingagua masup ba ngala salak yabania ranguaung, saing sanga ba ngamati ranguaung xauna.” Baing Yesu haxuya ba, “Pita, ngabalaung ba, hatata muga mana muxaxua xatu, bagula uhatiam manga bunging tuwa.”




Baing Yesu gabu lipuxindi
dinaxu mana dila long tela
duxu ba Getsemani,
saing harua nadi ba,
“Arung mua la li, ngabo
ba ngala yata lo ngasabu
to.” Baing sabu ba, “Mama,
Tibugu! Ung sanga ba ulibu
axamang longgalo. Unia
xuba salakkamga li mala
sangua nga. Ne heku usu
mana nga murungagua, ne
usu mana ung
murungama.”



Baing ina naga, lipu hananiangamdi yanamidingdi
xaung Parisidi ditabina Urana Numang wasanganam
teladi ba dila rangua Yudas. Rom haungingam
teladi digabudi xauna. Yudas luxu mana
umanga olipkamga ba, muga
manadi. Dirai nagungdi xaung
axamang haungingamdi.



Baing dingia tela ting waxanginoa mana lipu
hananiangam mugamugangama lipuxing oxata
olanggama, saing taxiti tangangliang rimamo.
Ne Yesu harua ba, “Asauya!” Baing ring lipua
tanganglianoa saing sok xai muli.



Kimuya mana dituxu, daxai mala lipu hananiangam
mugamugangama numania. Pita su manadi mala,
ne wa hasoya monga. Ning bungina dibura yaba
liwe mana numa yabana,
dirungguba, baing Pita
rung mari ranguadi.



Lipu hananiangam
mugamugangam lipuxing
haulingam tela li mua la ba.
Lipua ba lipua Pita taxiti
tanganglianoa ba sibing tela.
Xusunga ba, “Ngabagung uwa
rangua xaiya olip umangania?”
Ne Pita hatiam mana muli, saing
hata sibuna li muxaxua xatu.
Baing ina naga, Pita sok mala,
tang haringing sibuna.




Baing ina naga, yanamgadi ba ding longgalo dimesa daxai Yesu mala rangua gabana Pailat. Binabu Pailat xusunga Yesu ba, “Ung ba xaitamoxi Yuda dingia?”



Baing Yesu haxuya ba, “Wane, bila ung guharua ba.” Mana namua Pailat bo ba yunga Yesu mala, xusungadi muli.

Ning duwagiwagi ba,
“Ung mati xai balingamia!


Ung mati xai balingamia!”



Baing ina naga, Pailat ta Yesu lipu haungingamdi rimadingia bu dung mati xai balingamia. Binabu daxap Yesu mala. Ing sibuna xoxi xaing balingama mala, ila mana longga duxu ba Toxotaxu Guang Yabana (mana Erimeak xuana duxu ba Golgota).



La ba digoxi xai balingamia. Digoxi lipu
luwa rangua—tela wa hataina, tela wa
hataina, saing Yesu wa lia.




Xaidaba sina te. Baing imang sabangga silola mua
maluxu Urana Numania singina hataing luwa.


Baing Yesu wagi sabanga ba,

“Tibugu, ngata aningogua
mala rimamia.”

Harua laing sup,
baing matiuba.




Yosep Erimateam, Yuda Kaunsiliding
tela, haringiana saing ila rangua
Pailat, xusunga mana Yesu
sanganoa. Yosep yanoa
xai lipudi maxadingia,
ragu xauna mana
Urana Yonggaxinoa
sok.




Binabu Yosep gim imang xai sibung
tela, saing xap Yesu sangganoa
mari, saku imangia saing ta
maluxu mana guha
gobagoba tela disaba
sianga maluxu mala.
Baing ditutuxuya
siang sabanga ma
rangguti guha

gobagoba
xuania.



Xaidap Xauxaungama ila sup, baing
lipu hananiangamdi
yanamidingdi digabu
Parisidi dila rangua
Pailat. Dibala ba, “Lipu
Sabanga, am
gahatumia muli
haruanga tela lipu
murakkamga ba
harua
bungina
wauyu.”




“Harua ba, ‘Kimuya mana xaidap
tuwa bagula ngamesa muli.’”


Baing ina naga, dila
daharingia guhia
gobagoba bila li: Ditaga
sianga, dita raguna
mana bu bili, saing
dita lipu
haungingamdi
mali bu duwasa
mana.



Xaidap Yaguangama ila sup, baing
mana xaidap mugamugangam
mana sande baguba, xaidaba
haingguba, Maria
Magdalam gabu Maria
tela dila bu dibagu
guhia gobagobia.
Hata sibuna li
noxiga sabanga
sok!




Namua na Toxoratamona uleginam
tela ri long xaiya ma, saing ila
guhia gobagobia, tutuxuya
sianga mala singia
saing rung mana.
Lipu wasangamdi
dimaxuwa sibuna
mana, saing dilulu.
Saking disok bila
matiandi.



Urana uleginama harua na haingdi
ba, “Labu amaxuwau tai, namua
na ngaxabia ba tang gasai
mana Yesu, ina dung mati
xai balingamia ba. Wa
la li te! Mesa muli ba,
bila harua ba.
Tang gama abagu
longga muga


sangganoa tabu
mana ba.”




Baing ina naga, haingdi tang diluki
sap mala sangua guha gobagobia,
dimaxuwa ne gamodingdi diyaha
sibuna, saing diluki mala bu
dibaxanga na lipuxindi dinaxu
mana.



Hata sibuna li Yesu sok mana dintang. Harua ba, “Buraraging xai.” Tang dima rangua, dituxu kindi saing disabu mana.






Kimuya, bungina Lipu 11 dirung daxang mua, Yesu owa masok ranguadi. Gamiadi namua na dahatum haringin te xaung hatumingading diriba ding mana haruanga lipuadi dibagu bungina mesa muli dibaxanga nadi ba. Toxoratamona Yesu baxanga nadi laing sup, baing Urana xap mahaing long xaiya saing rung mana Urana rimang rimamo rubinia.



Namua na Urana muruna buk mana
lipu titiam longgalo, binabu sina
Garang taininau nadi, bu lipu gaxarea
dahatum haringina mana bagula
dahanggalang te. Tegu. Bagula
daxap walinga subingang
teguama.



Rom 3:23

Namua na lipu longgalo dilibu kubolu diandi. Ding longgalo diraxap mana axamang xai sibundi duwa Urana ralania.

Rom 6:23

Namua na kubolu diandi haxuyangadingdi bing matiyua, ning Urana yahanganoa bing walinga subingang teguama, sina olang nakira namua na tataga rangua Kristo Yesu Toxoratamona kiria.

Hibru 9:27

Lipudi kuboludinga bing dimati bunging taininau, saking dili haruangua Urana maxania.



Epasas 2:8,9

Namua na Urana atin dimoti mang, saing mana namua ba xapkang muli, namua na ahatum haringina. Alaba ma ranguang te. Yahangua baing. Urana sina nang olang. Sok mana oxataima te, nam lipu tela hasua.

Rom 10:9,10

Haruanga ba bing nabu ubaxanga suxungumia ba, “Yesu ina Toxoratamona,” xaung uhatum haringina hatumingamia ba Urana iti mesa mana matiyua, bing Urana bagula xapkung muli. Namua na mana hatumingama uhatum haringina bing usok maringina Urana maxania, xaung mana suxunguma ubaxanga bing Urana xapkung muli.



Yon 3:16,17

“Namua na Urana muruna buk mana lipu titiam longgalo, binabu sina Garang taininau nadi, bu lipu gaxarea dahatum haringina mana bagula dahanggalang te. Tegu. Bagula daxap walinga subingang teguama. Namua na Urana soxi Garanoa ma titia bu sina salaga nadi mana kuboluding diandi te. Tegu. Soxi ma bu xap lipu titiamdi muli.

1 Yon 5:11-13

Baing haruanga ba bing: Urana sina walinga subingang teguama nakira, saing walinga ba namua bing Garanoa. Lipu gaxarea taga rangua Urana Garanoa xap walingua. Lipu gaxarea taga rangua Urana Garanoa te, xap walingua te. Ngabung axadi li nang gaxarea ahatum haringina mana Urana Garanoa bu axabia ba axap walinga subingang teguama.



Matyu 26-28; Luk 22-24; Yon 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Mato NT (met) © 2018, Wycliffe Bible Translators, Inc.
All rights reserved.

<https://live.bible.is/bible/ME1PNG/MAT/1>

©2026 Bible for Children, Inc.

www.M1914.org

www.bibleforchildren.org

